

LI PTITE WACHLÈTE (5)

Wai ! Li ptite Wachlète aréve volu mète au batch tos cès agayons èt l' corone avou, don. “Dji seû Bén pus bèle avou lès rodjès fleurs di m' corti,” s' dijéve-t-èle, n' lès wazant rissatchî.

- Dji m' va fé come on a dit, a-t-èle dit tot s' avolant èviè l' djoû.

L' solia vinéve tot djusse di s' muchî kand s' florîye tièsse a rèxhu fou d' l' aiwe. Lès nuwâdjès èstîne co rôzès èt li stwèle do swêr riglatichève di s' clér aurâdje. L' èrèdje èstéve frisse èt doû. Pajère, l' grande basse n' s' avéve nén co dischandi. Sins pont d' vént po l' fé rider, sès vwèles flawses aflachîyes, on grand batia s' baloncève à pwinne. Sès marins n' duvîne nén awè dè masses a fé. Achids dsus l' pont i djouwîne dèl muzike à botche èt tchanter “Moman, lès ptits batias ki vont dsus l' euwe ont-is dè djambes...”

A l' chîje, dè lumères di totès lès coleûrs ont comincî à lumer. On aréve dit lès drapias d' tertos lès payis do monde. Wachlète a t-avizé l' grande fènièsse à l' arîre do batia èt s' afranchi à vnu pus près. Il î fèyéve ossi clér k' è plin solia si Bén ki, kand lès waches l' on tapé ène miète è l' èr, èle a polu î vîre, au mitan d' branmint d' djins fwârt Bén moussîs, li djonne prince do payi. Il avéve d' bias grands nwârs ouy èt on lî fièstéve sès sêze ans. Lès marins s' sont mêtus à bwêrler “Papy bûre dè tiyous *)” kand l' prince s' a amwinrné èt dè cintinnes di fuzêyes ont spité lon è l' cîr èt ritchère come dè skètes di stwèles. Dsus l' momint, Wachlète ènd' a pris peû èt s' riplonker tot profond mins èle n' a nén ratindu lontimps po rmonter èt vîre on spèctake k' èle n' aréve mauy imadjiné. L' nût èstéve faulîlêye pa dè spritches di feû ki s' kandjîne è solias èt roler èt pèter tot s'



riglatichant dins lès wachlotes. On vray èmacralaedje ! A tanawète èle vèyéve si clér ki rén di c'ki s' passéve dsus l' batia n' poléve lî chaper. Î ! mins ki l' prince èstéve bia ! Èt s' rîre, don ! k' il èstéve doû à sès orêyes ! Lès djins clapîne dins leus mwins èt l' muzike d' si rénonder èt d' si stinde au lon dins l' nût.

L' chîje trawêye finîye, l' pitite Wachlète èstéve co là, à n' s' awè disglumî sès ouy do batia èt sayî d' co todi vîre li prince. On a distindu lès lumères, djoké d' tirer dè fuzêyes èt dè tchambes... L'

batia s' a mêtû à boudjî. Adon, èle a ètindu on grondmint ki roléve èt monter do copumêr fond dèl basse. Lès waches ont spéchi èt xhumer. Dsus l' batia on a disployî lès vwèles. Dè sombrès nûlêyes s' sont amoncèlêyes èt abroker d' au lon. Dè alumwâres lès shûvîne. On vilin timps raplikéve à dadaye. Lès marins ont râde riployî lès twèles mins l' batia, wachoté come ène scaigne di gaye, s' a ènondé don lan. Mwêjîye, l' basse lancéve sès pus grossès waches, wôtes come dè mons, papadzeu lès mats do batia èt l' fé toûrner dsus place come li pus tène dè fistus.

Wachlète a trové ça Bén plêjant èt claper dins sès mwins mins lès omes n' avîne pus l' èr d' ièsse à l' dicausse. On mat sètchmint skèté, l' batia a ployî d' tos sès bwès èt s' clincî d' on costé. L' aiwe s' î a dauré èt s' î fé dè pus pèsantes.

Il a falu k' Wachlète fuchiche oblîdjîye d' waitî à n' si nén fé aroker pa totès lès skètes d' agayons tchèyant autoû d' lèye po k' èle si rinde conte ki lès djins î avîne dè rûjes. I lî faléve ratinde on alumwâr po co voye c'ki s' passéve d' sus l' batia. Chake î sayéve di tirer s' plan au mia. Èle n' î riconèchéve pus l' prince. Kand l' batia s' a côpé è deûs, èle l' a vèyu tchère è l' aiwe. Dsus l' momint èle ènn' a stî tote continue... (A shûre ?)

*) Po lès nén-polilinwes : “Happy birth day to you”

On comache todi...